



17. Tschanteda dal cussagl cumünel in marculdi, ils 4.9.2013 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Ines Barblan, Gian Fadri Largiadèr, Paolo Bernasconi (a partir da tractanda 136)

Absaints: Paolo Bernasconi (fin tractanda 135)

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 7.900 Zona da deponia e d'explotaziun da gera Bos-chetta Plauna, decisiun d'inoltrer actas da planisaziun a l'uffizi per il svilup dal territori Grischun per üna controlla preliminar
4. 0.210 Avegnir Hotel Scaletta SA, proposta dal cussagl administrativ Hotel Scaletta SA
5. 7.200 Revisa totela ledscha per l'economisaziun d'immundizchas, 1. lectüra
6. 7.200 Revisa totela uorden da taxas per l'economisaziun d'immundizchas, 1. lectüra
7. 0.112 Votumaziuns federelas e chantunelas dals 22.09.2013, büro electorel
8. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 14.08.2013 vain approvu unanimamaing.

135 0.211 Dumanda da fabrica Cas giuridic

In connex cul plaunt, respectivamaing la denunzcha concernent l'implanter bös-chs sainza tgnair aint la distanza da cunfin, ho gieu lö üna visita al lö ils 6 avuost 2013. Lo s'ho decis, da preciser la formulaziun i'l permiss da fabrica regard las distanzas da cunfin pels bös-chs. Scha que succeda, sun ils recurrents perinclets da trer inavous il plaunt / la denunzcha. Uossa s'ho elavuro üna formulaziun tenor la discussiun fatta al lö. Il cussagl decida unanimamaing da suottametter la proposta als 2 partieus.

**136 0.211 Dumanda da fabrica
Widmer Daniel e Remo, dumanda per sbuder garascha existenta**

Il cussagl piglia cugnuschentscha da la dumanda da Daniel e Remo Widmer per sbuder la garascha existenta sün parcella nr. 22 in Somvih. Ils patruns da fabrica haun inoltrö üna dumanda da fabrica per rimplizzer la garascha e siand cha la procedura da fabrica düra pü lönch, vulesan els sbuder la garascha existenta aunz cu esser in possess dal permiss. Il cussagl decida unanimamaing da pussibiliter als patruns da fabrica da sbuder la garascha cun differentas cundiziuns. Ines Barblan s'ho absanteda per quista tractanda.

**137 7.900 Planisaziun dal territori cumünel
Zona da deponia e d'explotaziun da gera Bos-chetta Plauna,
decisiun d'inoltrer actas da planisaziun a l'uffizi per il svilup dal
territori Grischun per üna controlla preliminar**

Il cussagl piglia cugnuschentscha da las actas regard la revaisa da la planisaziun locala in Bos-chetta Plauna, respectivamaing per ingrandir la zona da deponia. Il büro d'indschegneria Edy Toscano SA ho elavuro las actas insembel cul planiseder da nossa vschianuncha. Zieva üna lectüra da quellas decid'il cussagl unanimamaing d'inoltrer las actas a l'uffizi per il svilup dal territori Grischun per üna controlla preliminar. Duri Campell s'ho absanto per quista tractanda.

**138 0.211 0.210 Contrats e cunvegns
Avegnir Hotel Scaletta SA, dumanda dal cussagl administrativ
Hotel Scaletta SA**

Il cussagl administrativ da l'hotel Scaletta SA ho comunicho, cha l'hotel e'l restorant vegnan serros a partir dals 01.11.2013. Impü suottamettan ils respunsabels la dumanda, scha la vschinauncha vess interess da fitter il restorant e l'hotel per suotfitter inavaunt quel e giavüschan üna resposta fin ils 10.09.2013. Il fit dess cuvrir ils cuosts e las amortisaziuns da l'edifizi. Ils respunsabels sun da l'avis, chi pudess eir gnir discutto regard üna düreda pü lungia dal contrat da fittaunza. Zieva animeda discussiun decida il cussagl unanimamaing da tschercher üna soluziun per güder a l'hotel Scaletta. Per pudair valüter però la situaziun fo que dabsögn da differenta documainta. Il cussagl pretendenda dals respunsabels d'inoltrer la documainta neccessaria per cha la chosa po gnir trattada da nouv.

**139 7.200 Alluntanamaint da las immundizchas
Revaisa totela ledscha per l'economisaziun d'immundizchas,
1. lectüra**

La ledscha per l'economisaziun d'immundizchas actuel valabla es gnida approveda da la radunanza da l'an 2000. Düraunt ils 13 ans passos ho que do differentas revaisas da las ledschas superiuras, ma eir la disciplina da la populaziun regard l'alluntanamaint d'immundizchas s'ho müdeda. La proposta da la ledscha per l'economisaziun d'immundizchas es uossa avaintmaun e'l cussagl decida cun 4 cunter 1 vusch d'entrer illa tractanda. Zieva avoir fat differents adattamaints decid'il cussagl da fer illa prosma tschantada üna seguonda lectüra da la ledscha.

**140 7.200 Alluntanamaint da las immundizchas
Revaisa totela uorden da taxas per l'economisaziun
d'immundizchas, 1. lectüra**

Resguardand la revaisa totela da la ledscha per l'economisaziun d'immundizchas es da fer eir üna revaisa totela da l'uorden da taxas. Il cussagl decida da metter inavous quista tractanda, siand cha la ledscha per l'economisaziun d'immundizchas bsögna üna seguonda lectüra e nun ho pudieu gnir deliberada.

**141 0.112 Votumaziuns
Votumaziuns federelas e chantunelas dals 22.09.2013, büro
electorel**

Al büro electorel per las votumaziuns federelas e chantunelas dals 22 settember 2013 faun part: Gian Andrea Bott, Jnes Barblan, Patrice Mayer e Duri Schwenninger.

142 9.999 Varia

Il president infurmescha al cussagl regard ils resultats da la retschercha „che via giains in Engiadin'Ota“. Il resultat es, cha 59.1% dals partecipants da la retschercha sun per üna collavuraziun intercumünela, a S-chanf 75%, 40.9% per üna fusiun, a S-chanf 25%. In nossa vschinauncha haun piglio part 17.5% da las votantas e'ls votants, la media da tuot l'Engiadin'Ota es tar 15.2%. La preschantaziun da la retschercha vain missa sün nossa pagina d'internet.

Inavaunt infurmesch' il president regard la communicaziun da l'uffizi per il svilup dal territori Grischun, cha causa il volüm cumplex da la revaisa totela da la planisaziun locala es da fer quint cha quella vain trattada da la Regenza pür vers la fin da november 2013, e na scu comunicho aunz la fin dal mais avuost 2013.

A las 22.35 vain la tschanteda alveda.

In buna fè

L'actuar:
D. Schwenninger